

**Najib Seru Umat Islam Kembali Bersatu, Jadikan Malaysia Negara Islam Progresif  
Bernama  
5 Jun, 2013**

KUALA LUMPUR, 5 Jun (Bernama) -- Sempena peristiwa Israk dan Mikraj, Datuk Seri Najib Tun Razak menyeru umat Islam di negara ini agar kembali bersatu hati meneruskan agenda transformasi demi menjadikan Malaysia sebuah negara Islam moden yang progresif.

Mengambil contoh Nabi Muhammad s.a.w yang mengimami solat yang disertai seluruh para nabi semasa peristiwa itu di Masjidil Aqsa, Perdana Menteri berkata ia menjelaskan kepentingan menyatukan ummah dalam menegakkan risalah Allah di muka bumi ini.

"Oleh yang demikian, sempena peristiwa hebat Israk dan Mikraj ini, marilah kita semua kembali bersatu hati dalam meneruskan agenda transformasi kita untuk menjulang Malaysia menjadi sebuah negara Islam moden yang progresif, maju dan berpendapatan tinggi pada tahun 2020 nanti," katanya dalam perutusan khas sempena peristiwa Israk dan Mikraj 1434H, yang dimuatnaik di laman blog [www.1malaysia.com.my](http://www.1malaysia.com.my) Rabu.

Beliau berkata peristiwa Israk dan Mikraj yang berlaku dalam bulan Rejab bagi menyatakan kekhususan Nabi Muhammad s.a.w itu memberi makna yang besar kepada seluruh umat Islam.

Katanya, pelbagai elemen seperti keimanan, sejarah, sirah, politik, sosial, geografi dan teknologi telah digabung-jalinkan untuk dijadikan iktibar kepada umat pada masa ini.

Selain itu, Najib berkata peristiwa itu secara langsung akan terus mengingatkan umat Islam kepada Masjidil Aqsa di Palestin yang merupakan masjid suci ketiga dalam Islam.

Perdana Menteri berkata keadaan Palestin hari ini merupakan satu pengajaran akan kepentingan mempertahankan keamanan dan kemakmuran, selain memberi amaran betapa malangnya jika Malaysia diganggu-gugat oleh kuasa asing.

"Semoga peristiwa agung penuh berkat ini membawa seribu rahmat buat kita semua. Mengakhiri perutusan ini, saya dan keluarga mengucapkan Salam Israk dan Mikraj kepada semua umat Islam Malaysia di mana jua berada," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=954312>